

ԿԱՐԾԻՔ

ԴԻԱՆԱ ՍԵՐԳԵՅԻ ՄԱԹԵՎՈՍՅԱՆԻ «ՀՀ ԱՐՏԱՔԻՆ ԱՌԵՎՏՐԱՅԻՆ ԵՎ ՄԱԿՐՈՏՆՏԵՍԱԿԱՆ ՔԱՂԱՔԱԿԱՆՈՒԹՅՈՒՆՆԵՐԻ ՓՈԽԱՌՆՉՈՒԹՅԱՆ ՀԻՄՆԱԽՆԴԻՐՆԵՐԸ» ԹԵՄԱՅՈՎ ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ, ՆԵՐԿԱՅԱՑՎԱԾ Ը.00.06 - «ՄԻՋԱԶԳԱՅԻՆ ՏՆՏԵՍԱԳԻՏՈՒԹՅՈՒՆ» ՄԱՍՆԱԳԻՏՈՒԹՅԱՄԲ ՏՆՏԵՍԱԳԻՏՈՒԹՅԱՆ ԹԵԿՆԱԾՈՒԻ ԳԻՏԱԿԱՆ ԱՍՏԻՃԱՆԻ ՀԱՅՑՄԱՆ ՀԱՄԱՐ

Հեղազոտության թեմայի արդիականությունը: ՀՀ տնտեսությունը, լինելով փոքր և բաց, խիստ զգայուն է աշխարհում տեղի ունեցող զարգացումների նկատմամբ, ինչը դրսևորվում է ինչպես տնտեսական աճի, այնպես էլ անկման ժամանակահատվածներում: ՀՀ տնտեսության համար բնութագրական է գլոբալ տնտեսական պարբերաշրջանի աճի փոլում համաշխարհային տնտեսության աճի տեմպերը գերազանցող աճը, իսկ անկման փոլում՝ ավելի խոր անկումը: Այս երևույթը բնորոշ է ոչ միայն ՀՀ-ին: Զարգացող երկրների տատանումները սրում են արտաքին ֆինանսական հոսքերը, իսկ մակրոտնտեսական քաղաքականությամբ դրանց արդյունավետորեն հակազդել սովորաբար չի հաջողվում, ավելին՝ մակրոտնտեսական քաղաքականությունն իր հերթին հաճախ դառնում է տատանումները սրող գործոն:

Նման իրավիճակը հատկապես կարևոր է դարձնում մակրոտնտեսական քաղաքականության համարժեք և ժամանակին արձագանքը տնտեսության խոցելիությունների կուտակմանը:

Այստեղ ընդգծված անհրաժեշտություն են դառնում նաև արտաքին առևտրային և մակրոտնտեսական քաղաքականությունների համակարգման, դրանց փոխառնչությունների գնահատման խնդիրները:

Վերոնշյալն ընդգծում է Հայաստանի արտաքին առևտրային քաղաքականության հիմնախնդիրների և երկրում վարվող մակրոտնտեսական քաղաքականության ներդաշնակեցման ակնհայտ կարևորությունը, ինչն էլ պայմանավորում է ատենախոսության թեմայի **արդիականությունն ու անհրաժեշտությունը:**

Ատենախոսության կառուցվածքը հնարավորություն է ընձեռել բացահայտել հետազոտվող հիմնահարցի բնութագրական կողմերը, ապահովել դրանցով պայմանավորված խնդիրների լուծման հաջորդականությունը, պահպանել առաջարկված մոտեցումների գործնական նշանակության հիմնավորմանը և ամբողջական հետազոտության իրականացմանը հատուկ այլ սկզբունքները:

Աշխարանքի ներածությունում ներկայացված է ատենախոսության թեմայի արդիականությունն ու հրատապությունը, դրված է հետազոտության նպատակը և տրված են դրան հասնելու համար լուծման ենթակա խնդիրները: Այստեղ ամրագրված են այն հիմնական գիտական արդյունքները և դրանց գիտական նորույթը, որոնցով աշխատանքը ձեռք է բերում գիտական արժեք, բնութագրված են տեսական և մեթոդական այն հիմքերը, որոնց վրա կառուցված են հեղինակի մշակումներն ու եզրահանգումները:

Ատենախոսության առաջին՝ «Արտաքին առևտրի և մակրոտնտեսական ցուցանիշների փոխազդեցության տեսական և մեթոդաբանական հիմնադրույթները» գլխում հեղինակը ներկայացրել է արտաքին առևտրի դինամիկան և կանխատեսման տեսամեթոդական դրույթները, մակրոտնտեսական ցուցանիշների համակարգը և ՀՀ հիմնական մակրոտնտեսական ցուցանիշների դինամիկան, արտաքին առևտրի և մակրոտնտեսական ցուցանիշների համակարգի փոխկախվածության տեսական դրույթները, համապարփակ ձևով քննարկել է ՀՀ տնտեսական քաղաքականությունը:

Այս համատեքստում կառուցվել և գնահատվել է ՀՀ տնտեսության թվայնացման մակարդակը բնութագրող համաթվի դինամիկան բնութագրող մոդել, որի հիման վրա կատարվել են ենթադրություններ: Ներկայացվել են նաև արտաքին առևտրային և մակրոտնտեսական քաղաքականությունների փոխկախվածության մասին տարբեր տեսություններ, վերլուծության և գնահատման մոտեցումներ:

Ատենախոսության երկրորդ՝ «Արտաքին առևտուրը որպես Եվրասիական տնտեսական միության անդամ երկրների մակրոտնտեսական կայունության գործոն» գլխում, ներկայացվել են Եվրասիական տնտեսական միության մակրոտնտեսական քաղաքականությունը, ԵԱՏՄ արտաքին առևտրի և մակրոտնտեսական ցուցանիշների փոխազդեցության վերլուծությունը, ՀՀ արտաքին առևտրի վրա ԵԱՏՄ անդամակ-

ցության էֆեկտի գնահատումը: Այդ նպատակով հաշվարկվել են բազիսային (մինչև ԵԱՏՄ-ին անդամակցելը) ժամանակաշրջանի համար մի քանի ինդեքսներ՝ գնային և ծավալային կազմով՝ առևտրի ծավալների փոփոխություն, առևտրի պայմանների փոփոխություն, դրանք էքստապոլացվել են և համադրվել փաստացի (ԵԱՏՄ-ին անդամակցելուց հետո) ժամանակաշրջանի արժեքների հետ՝ դիֆերենցիալը ցույց տալու նպատակով:

Արենախոսության երրորդ՝ «Հարտաքին առևտրի և մակրոտնտեսական քաղաքականության փոխազդեցության գնահատականը» գլխում, ներկայացվել են ՀՀ արտաքին առևտրի և մակրոտնտեսական ցուցանիշների փոխկախվածության գնահատականները, ինչպես նաև իրականացվել է արտաքին առևտրի և այլ մակրոտնտեսական ցուցանիշների վրա շոկերի ազդեցության մոդելավորում:

Ըստ հեղինակի եզրահանգման՝ առավելագույն ՀՆԱ ունենալու համար պետք է մակրոտնտեսական քաղաքականության համակարգումը լինի խթանող բյուջետային և դրամավարկային, սակայն առաջինի դեպքում սահմանափակված ենք պարտաքային բեռով, իսկ 2-րդի դեպքում՝ գնաճի նպատակային ցուցանիշով: Անհրաժեշտություն է առաջանում քաղաքականությունների զուգորդման, հակառակ ազդեցության կամ հաջորդական կիրառման մեխանիզմների մշակման: Ցանկացած պարագայում միայն մեկ քաղաքականության գործիքի անընդհատ կիրառումն անընդունելի է: Ստացվում է, որ սկզբնական շրջանում արտաքին առևտրի խթանման քաղաքականությունը պետք է զուգորդվի չափավոր բյուջետային հատկացումներով (ծառայությունների առևտրի խթանում), իսկ ստացված օպտիմալ մակարդակից ավելի արտարժույթն ուղղել պարտքի սպասարկմանը և արժութային պահուստին: Հաջորդ կետում, արդեն ունենալով պարտքային ավելի ցածր բեռ՝ խթանող բյուջետային քաղաքականության միջոցով նպաստել արտահանում իրականացնող արտադրությունների ինքնաբավ ցիկլ ունենալուն:

Եզրակացություններում և առաջարկություններում հիմնականում ամփոփվել են և հակիրճ ձևակերպվել հետազոտության արդյունքում ստացված հիմնական եզրահանգումներն ու առավել առարկայական առաջարկները:

Ատենախոսությունում իրականացված վերլուծությունները հիմնված են դիտարկվող բնագավառի դասականների, ինչպես նաև ժամանակակից հետազոտողների ուսումնասիրությունների վրա: Մեթոդաբանական և տեղեկատվական առումով աշխատանքում օգտագործված են պաշտոնական շրջանառության մեջ գտնվող նյութեր և տվյալներ: Այս հանգամանքը թույլ է տվել հեղինակին ապահովել աշխատանքում ստացված արդյունքների անհրաժեշտ հիմնավորվածություն և հավաստիություն:

Աշխատանքի գիտական նորույթը կայանում է նրանում, որ հաշվարկվել է ՀՀ տնտեսության՝ արտաքին առևտրից կախվածության գործակիցը, կառուցվել են գործոնային ռեգրեսիոն մոդելներ և դրանց հիման վրա կատարվել է էլաստիկության վերլուծություն, հաշվարկվել են ԵԱՏՄ-ում աշխատանքի, կապիտալի և ՀՆԱ էլաստիկության գործակիցները և դուրս են բերվել առևտրաշրջանառություն-կապիտալ ու առևտրաշրջանառություն-աշխատանք քրոսս-էլաստիկության գործակիցները, գնահատվել է ՀՀ արտաքին առևտրի վրա ԵԱՏՄ անդամակցության ազդեցությունը, իրականացրել է առևտրային հաշվեկշռի կանխատեսում, IS-LM-BP մոդելի միջոցով գնահատվել է ՀՀ արտաքին առևտրային և մակրոտնտեսական քաղաքականությունների փոխկախվածությունը:

Մեթոդաբանական և մեթոդական տեսանկյունից հետազոտության արդյունքները ընձեռում են լայն հնարավորություն կողմնորոշվելու անցման փուլում գտնվող երկրներում արտաքին առևտրային և մակրոտնտեսական քաղաքականությունների ներդաշնակեցման առավել հրատապ հիմնախնդիրների լուծման հարցում:

Ատենախոսության գիտագործնական նշանակությունը պայմանավորված է նրանով, որ ուսումնասիրության արդյունքները կարող են օգտագործվել զարգացող երկրներում, այդ թվում՝ Հայաստանի Հանրապետությունում արտաքին առևտրային և մակրոտնտեսական քաղաքականությունների համակարգումն ապահովող ծրագրերի իրատեսականությանը, այդ քաղաքականությունների բարելավմանը և արտաքին տնտեսական հարաբերությունների ազդեցության գնահատմանը նվիրված ուսումնասիրությունների և գործնական մշակումների ժամանակ:

Ատենախոսության վերաբերյալ կան **դիպրոդություններ և առաջարկություններ**, որոնք գրախոսվող աշխատանքի թեմայով ուսումնասիրությունների շարունակման դեպքում, մեր կարծիքով, պետք է արժանանան հեղինակի ուշադրությանը: Դրանցից հատկապես անհրաժեշտ է նշել հետևյալները:

1. Ներածությունում հիմնավորված չէ այն փաստը, որ երկրորդ գլուխը նվիրված է ԵԱՏՄ-ին, նույնիսկ եթե Հայաստանը ԵԱՏՄ անդամ պետություն է:
2. Որևէ կերպ չի ընկալվում 2007-2009 թթ. ճգնաժամի ազդեցության գնահատումը որպես նորույթ դիտարկելը, առավել ևս, որ այդ ժամանակ ԵԱՏՄ-ն չկար, ի՞նչ ԵԱՏՄ առևտրաշրջանառության մասին է խոսքը:
3. Քննարկման ենթակա է այն հարցը, արդյո՞ք պետք է առաջին գլխում ներկայացնել ՀՀ համապատասխան ցուցանիշների դինամիկան, հետո անդրադառնալ արտաքին առևտրի և մակրոտնտեսական ցուցանիշների փոխկապվածության տեսական հիմքերին: Կարծում ենք, սկզբից պետք է ներկայացվեն տեսական հիմքերը:
4. Ինտեգրման տեսական, ճանաչողական ասպեկտները (2.1. ենթագլուխ) տեղին չեն, քանի որ խոսքը կոնկրետ պետք է վերաբերի ԵԱՏՄ-ին: Առավել ևս, արտաքին առևտրաշրջանառության և մակրոտնտեսական ցուցանիշների փոխառնչությունները հեղինակը չի դիտարկում:
5. Ատենախոսության 3.1. ենթագլխում հեղինակը ներկայացրել է արտաքին առևտրի վրա մի շարք շոկերի ազդեցությունը, սակայն մակրոտնտեսական ցուցանիշների հետ փոխառնչության վերաբերյալ խնդիրը չի քննարկվել:
6. Կարծում ենք, առաջարկությունների և մեխանիզմների առաջադրման մասը որոշ չափով թույլ է ներկայացվում, հասցեականությունը բավականին մշուշոտ է: Եզրակացությունների մեջ մակրոտնտեսական ցուցանիշների վերաբերյալ ճանաչողական բնույթի նյութերը հիմնավոր չեն:
7. Բացառությամբ IS-LM-BP մոդելի և վերջինիս մեկնաբանությունների, ընդհանուր առմամբ, հեղինակը քիչ է ներկայացնում արտաքին առևտրի և մակրոտնտեսական ցուցանիշների փոխառնչության խնդիրները:

8. Ատենախոսությունում բացակայում է միջազգային փորձը: Արդյո՞ք դա անհրաժեշտ չէր համաշխարհային թրենդներն ընկալելու և հնարավոր դրականը վերցնելու համար:

ԵԶՐԱԿԱՑՈՒԹՅՈՒՆ

Արված դիտողությունները էապես չեն ազդում հետազոտության արժանիքների վրա, այլ հետապնդում են Հայաստանի Հանրապետությունում արտաքին առևտրային և մակրոտնտեսական քաղաքականությունների նպատակայնության բարձրացման, զարգացող երկրներում այդ խնդիրների լուծմանը և զարգացմանն ուղղված քաղաքականությանը նվիրված հետազոտումնասիրությունների արդյունավետության բարձրացման նպատակ:

Դ. Մաթևոսյանի թեկնածուական ատենախոսությունն ունի ընդգծված գիտագործնական նշանակություն, իրենից ներկայացնում է ինքնուրույն և ամբողջական հետազոտություն, որտեղ դրված և լուծված են հանրապետության համար կարևոր ու արդիական խնդիրներ:

Հեղինակը հանդես է բերել մասնագիտական ու վերլուծական բավարար մակարդակ, ինչի մասին են վկայում ատենախոսությունը և դրանում ստացված արդյունքները: Աշխատանքում մշակված առաջարկությունները և կատարված եզրահանգումները կարող են օգտագործվել Հայաստանի Հանրապետության արտաքին առևտրային և մակրոտնտեսական քաղաքականությունների կատարելագործման, մասնավորապես՝ տնտեսության զարգացման շրջանակներում այդ քաղաքականությունների համակարգման հարցերով զբաղվող մարմինների գործունեության հիմնախնդիրների լուծման ուղղությամբ որակապես նոր մոտեցումների ներդրման ընթացքում:

Հետազոտության հիմնական արդյունքները հրապարակված են:

Ատենախոսության սեղմագիրը համապատասխանում է ուսումնասիրության բովանդակությանը և արտացոլում է աշխատանքի կարևորագույն դրույթներն ու արդյունքները:

Ընդհանուր առմամբ, «ՀՀ արտաքին առևտրային և մակրոտնտեսական քաղաքականությունների փոխառնչության հիմնախնդիրները» թեմայով ատենախոսությունը համապատասխանում է Հայաստանի Հանրապետության «Գիտական աստիճանաշնորհման կանոնակարգի» 6-րդ և 7-րդ կետերին, ինչպես նաև՝ թեկնածուական ատենախոսություններին ներկայացվող պահանջներին, իսկ նրա հեղինակն արժանի է Ը.00.06 - «Միջազգային տնտեսագիտություն» մասնագիտությամբ տնտեսագիտության թեկնածուի գիտական աստիճանի շնորհմանը:

ՊԱՇՏՈՆԱԿԱՆ ԸՆԴԴԻՄԱԽՈՍ՝

ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ

ՀԱՄԱԼՍԱՐԱՆԻ «ՄԻՋԱԶԳԱՅԻՆ ՏՆՏԵՍԱԿԱՆ

ՀԱՐԱԲԵՐՈՒԹՅՈՒՆՆԵՐ» ԱՄԲՈՆԻ ՊՐՈՖԵՍՈՐ,

ՏՆՏԵՍԱԳԻՏՈՒԹՅԱՆ ԴՈԿՏՈՐ, ՊՐՈՖԵՍՈՐ



Դ. ՀԱԽՎԵՐԴՅԱՆ

ՊԱՐՈՆ Դ. ՀԱԽՎԵՐԴՅԱՆԻ ՍՏՈՐԱԳՐՈՒԹՅՈՒՆԸ

ՀԱՍՏԱՏՈՒՄ ԵՄ՝

ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ

ՀԱՄԱԼՍԱՐԱՆԻ ԳԻՏԱԿԱՆ ՔԱՐՏՈՒՂԱՐ՝

01.07.2024 թ.



ՍՏՈՐԱԳՐՈՒՄ